

乾隆大藏經



乾隆大藏經



御製

佛光恩照三千大千
恒沙法界普度衆生
身心安泰年時豐稔
日月升恒乾坤清寧
上下樂利中外協和
萬善圓成情與無情
大清雍正十三年四月初八日
隨緣徧滿
悉證菩提
風雨調順
百昌蕃熾
庶物咸亨
同登正覺

第八七册 諸宗部此土著述(二一)

妙法蓮華經要解 二〇卷(卷九至卷一九)

含妙法蓮華經要解科文一卷

大佛頂首楞嚴經會解 二〇卷

亦名：大佛頂如來密因修證

了義諸菩薩萬行首楞嚴經會解

慧文正辯佛日普照元叟端禪師語錄 四卷

亦名：元叟端禪師語錄

佛日普照慧辯楚石禪師語錄 一六卷

亦名：楚石琦禪師語錄

佛祖歷代通載 三六卷(卷一至卷一八)

溫陵開元蓮寺比丘戒環解……………一

天竺沙門般刺密帝譯 烏菴國沙門彌伽釋迦譯語

菩薩戒弟子前正議大夫同中書門下平章事

房融筆受 師子林沙門惟則會解……………一八七

嗣法門人法琳編……………五三九

小師比丘祖光編……………六三七

嘉興路大中祥符禪寺住持華亭念常集……………九六一

妙法蓮華經要解

溫陵開元蓮寺比丘

戒環

解



清刻龍藏佛說法變相圖

妙法蓮華經要解卷第九

溫陵開元蓮寺比丘 戒環 解

佛告諸比丘是十六菩薩常樂說是妙法華經一一菩薩所化六百萬億那由他恒河沙等衆生世世所生與菩薩俱從其聞法悉皆信解以此因緣得值四萬億諸佛世尊于今不盡

徵昔所化會今之緣也所化之衆常與師俱者爲化緣深故以是得值億萬多佛其緣未盡今復相值

諸比丘我今語汝彼佛弟子十六沙彌今皆得阿耨多羅三藐三菩提於十方國土現在說法有無量百千萬億菩薩聲聞以爲眷屬其二沙彌東方作佛一名阿閼在歡喜國二名須彌頂

陳十六王子成佛名迹也。天地設位道運乎其中。聖人法之以開物成務。冒天下之道。故八方之佛各依一方而示一德。所以開物所以成務。原始要終。則天下之道無不冒矣。東方震爲動。歡喜亦動也。阿閼云無動。須彌頂又無動之極也。經云毀譽不動。如須彌。此佛出應群動而其體無動。又在動國示即動而靜也。二佛並化其德相資。故雖二名可以合釋。或曰八卦乃中夏之書。引配竺教。豈佛意耶。李長者用釋華嚴。呂觀文用釋此章。或者非之子復蹈襲何也。曰竺夏一天下耳。壇畿所及方位所同。而卦乃天地自然之理。獨不同哉。伏羲畫之以示人。吾佛象之以設法。各默得其同耳。今經雖無八卦之文。顯有八方之象。

借事明理。烏乎不可。而必拘墟詆訾。非達士也。昔五百應真。各解佛言。而問誰當佛意。佛言皆非我意。衆曰不當。佛意將無得罪。佛言雖非我意。各順正理。堪爲聖教。有福無罪。吾唯守此以當。或者之非。

東南方二佛一名師子音二名師子相

東南巽爲柔順。師子音者所說無畏。師子相者所示無畏。此佛以慈柔應物。以無畏說法。

南方二佛一名虛空住二名常滅

南方離爲虛明。虛空住者體至虛。以應群實也。常滅者了一切法當體虛。凝即寂滅。相不復更滅。是謂常滅。

西南方二佛一名帝相二名梵相

西南坤爲資生。帝相者神出而應物。爲帝

梵淨也此佛以神應物物資以生而其德常淨不累於物

西方二佛一名阿彌陀二名度一切世間苦惱

西方兌爲毀折阿彌陀云無量壽世間苦惱即生死無常也此佛於毀折之際示無量壽則了無生死以救度世間生死苦惱
西北方二佛一名多摩羅跋梅檀香神通二名須彌相

西北乾爲剛健多摩羅梅檀香清遠潛通以此神通須彌相亦無動義此佛神通應物如乾道不息寂然不動感而遂通
北方二佛一名雲自在二名雲自在王

北方坎爲陰陷雲自在謂無心而利物雲自在王又自在之至也此佛以無緣慈覆

陰利澤險難衆生而無心無着如雲之自在

東北方佛名壞一切世間怖畏

東北艮爲萬物成始成終之所始終之理在物爲成壞在人爲生死乃世間之所怖畏也此佛於生死畏中以一真凝常之道開覺群物使達其無始無終而入於不死不生則世間怖畏壞滅矣

第十六我釋迦牟尼佛於娑婆國土成阿耨多羅三藐三菩提

釋迦牟尼云能仁寂默謂其德仁濟群類其道寂默無爲以示化堪忍故號能仁此繼東北方而特標者大覺雖具成始成終之德而其道圓應不滯方隅無始無終爲衆德之總故也蓋自無動而出應群動能

衆能剛說示無畏虛已應物現壽運神乃至濟險滅怖無非釋迦隨宜之行故歷言八方佛德而以釋迦總之斯乃範圍天地曲成萬物無方無體之至德也非成無上正道何以與此故曰釋迦牟尼於娑婆國成阿耨菩提

諸比丘我等爲沙彌時各各教化無量百千萬億恒河沙等衆生從我聞法爲阿耨多羅三藐三菩提此諸衆生于今有住聲聞地者我常教化阿耨多羅三藐三菩提是諸人等應以是法漸入佛道

明昔因今緣使知功行已深而成就之也舉爲沙彌所化明昔因也于今所化明今緣也應以是法漸入佛道即成就之也所以者何如來智慧難信難解

釋上既曠劫蒙教今猶漸入者以如來智慧難信解故然衆生莫不有如來智慧而難解若此者塵習自障故也以今人觀之幸聞正法不無宿因安知吾徒非智勝之遺塵非未來之弟子然緣障尚稠道果渺邈即曠劫蒙教今猶漸入者也若能勤進猶可庶幾設復退墮又安知未來之期比前塵劫不復過於數耶然則所謂難解者非佛智之難機自難耳

爾時所化無量恒河沙等衆生者汝等諸比丘及我滅度後未來世中聲聞弟子是也

上明蒙化之因此指所化之人

我滅度後復有弟子不聞是經不知不覺菩薩所行自於所得功德生滅度想當入涅槃我於餘國作佛更有異名是人雖生滅度之

想入於涅槃而於彼土求佛智慧得聞是經
唯以佛乘而得減度更無餘乘除諸如來方
便說法

上云未來聲聞謂曾蒙化者此云復有弟
子言未蒙化者其因緣展轉終當遇佛而
依一乘得度也餘國作佛者示減於此而
應緣於彼也更有異名者華嚴云如來名
迹應衆生心各各不同於一四天下乃至
十方各各十千是也

諸比丘若如來自知涅槃時到衆又清淨信
解堅固了達空法深入禪定便集諸菩薩及
聲聞衆爲說是經世間無有二乘而得減度
唯一佛乘得減度耳

前明始權此會終實也涅槃時到言化緣
將畢衆又清淨言根機已熟衆清淨者已

於藏教斷惑除結也信堅固者已於通教
心相體信也了達空法謂已悟般若深入
禪定謂妙造玄源如此則諸病已除醫方
亦遣故廢二權特明一實得減度者得真
常道果也

比丘當知如來方便深入衆生之性知其志
樂小法深着五欲爲是等故說於涅槃是人
若聞則便信受

爲樂小者權說小果彼便信受如滯化城
譬如五百由旬險難惡道曠絕無人怖畏之
處

譬諸生死煩惱惡道險難長遠也五百由
旬舊說尤多今取二乘斷三界結惑離分
段生死證有餘涅槃是過三百由旬而至
化城然尚滯變易生死若回心向大進至

七地斷盡習氣是過四百由旬近於寶所
又進八地已上斷盡無明離變易生死證
無餘涅槃是過五百由旬到寶所也曠絕
無人等譬生死長遠無真知見妄起怖畏
若有多衆欲過此道至珍寶處

譬三乘求佛

有一導師聰慧明達善知險道通塞之相將
道衆人欲過此難

導師指津之人譬釋尊也通斯進之塞斯
止之通譬斷惑塞譬起障又善則通惡則
塞乃可無難

所將人衆中路懈怠白導師言我等疲極而
復怖畏不能復進前路猶遠今欲退還

譬二乘求道難進易退

導師多諸方便而作是念此等可愍云何捨

大珍寶而欲退還作是念已以方便力於險
道中過三百由旬化作一城告衆人言汝等
勿怖莫得退還今此大城可於中止隨意所
作若入是城快得安隱若能前至寶所亦可
得去

譬因二乘斷三界結惑後息以小果而進
之智地也隨意所作即任力所能漸得入
道之義

是時疲極之衆心大歡喜嘆未曾有我等今
者免斯惡道快得安隱

稱願息之心故也

於是衆人前入化城生已度想生安隱想

樂小忘大

爾時導師知此人衆既得止息無復疲倦即
滅化城語衆人言汝等去來寶處在近向者

大城我所化作爲止息耳

化非真有故斯須即滅唯實所爲真權非實有故終竟而廢唯一乘爲實

諸比丘如來亦復如是今爲汝等作大導師知諸生死煩惱惡道險難長遠應去應度若衆生但聞一佛乘者則不欲見佛不欲親近便作是念佛道長遠久受勤苦乃可得成

若但聞一乘而無權濟則厭大而不欲見佛憚煩而憂其道遠故須權濟也上言惡道長遠此言佛道長遠者上以正見觀衆生此以倒見觀佛道故也佛道初不遠人本無修證特由生死背馳復之之難故見其長遠惑業積障治之之難故見其勤苦則長遠勤苦由倒妄起何關於道哉苟無生死無惑業則當體疑淨何復何治長遠

之見勤苦之功了無所施矣昧者不知出此而致咎佛道遂生懈退大覺所以叙其倒見而誘進之

佛知是心怯弱下劣以方便力而於中道爲止息故說二涅槃

中道即大小乘之中間也二涅槃即二乘涅槃下云二地是也

若衆生住於二地如來爾時即便爲說汝等所作未辦汝所住地近於佛慧當觀察籌量所得涅槃非真實也但是如來方便之力於一佛乘分別說三如彼導師爲止息故作大城既知息已而告之言實處在近此城非實我化作耳

住於二地謂滯二乘權果而不知進故語之佛慧令觀察籌量而進取實果也

爾時世尊欲重宣此義而說偈言

大通智勝佛 十劫坐道場 佛法不現前
不得成佛道 諸天神龍王 阿修羅衆等
常雨於天華 以供養彼佛 諸天擊天鼓
并作衆技樂 香風吹萎華 更雨新好者
過十小劫已 乃得成佛道 諸天及世人
心皆懷踊躍 彼佛十六子 皆與其眷屬
千萬億圍遶 俱行至佛所 頭面禮佛足
而請轉法輪 聖師子法雨 充我及一切
世尊甚難值 久遠時一現 爲覺悟羣生
震動於一切

聖師子者讚聖力無畏也世尊難值已下
頌出世本懷而請法

東方諸世界 五百萬億國 梵宮殿光曜
昔所未曾有 諸梵見此相 尋來至佛所

散華以供養 并奉上官殿 請佛轉法輪
以偈而讚歎 佛知時未至 受請默然坐
三方及四維 上下亦復爾 散華奉宮殿
請佛轉法輪 世尊甚難值 願以本慈悲
廣開甘露門 轉無上法輪 無量慧世尊
受彼衆人請 爲宣種種法 四諦十二緣
無明至老死 皆從生緣有 如是衆過患
汝等應當知

無明至老死舉十二因緣也皆從生緣
明無生即無衆過患也

宣暢是法時 六百萬億姪 得盡諸苦際
皆成阿羅漢

頌初會聞法獲益之利根也風俗通云十
萬曰億十億曰兆十兆曰京十京曰穽十
穽曰姪姪爲總大之數即所謂那由他也

第二說法時 千萬恒沙衆 於諸法不受
亦得阿羅漢 從是後得道 其數無有量
萬億劫算數 不能得其邊

頌次第獲益中下之根

時十六王子 出家作沙彌 皆共請彼佛
演說大乘法 我等及營從 皆當成佛道
願得如世尊 慧眼第一淨

小乘慧眼未免緣影求其第一清淨無如
世尊故願得之

佛知童子心 宿世之所行 以無量因緣
種種諸譬喻 說六波羅蜜 及諸神通事
分別真實法 菩薩所行道 說是法華經
如恒河沙偈

知童子心即前云深心所念佛自證知也
說六波羅蜜等即前云過二萬劫之事也

六波羅蜜即般若教諸神通事即方等教
且分別實法爲大乘之始而已過是已後
乃說法華然有如恒沙偈者妙法應機廣
略不同故釋迦則一期而說燈明八十劫
說大通八千劫說今經止於二十八品當
不輕於威音則聞二十千萬億偈喜見於
日月淨明德則聞八百萬億阿閼婆偈蓋
各隨其緣之賒促根之廣狹故說有豐約
其實稱性之法無所終窮是以華嚴有三
部之文而一字法門書海壘而不盡則恒
沙之偈不爲多也

彼佛說經已 靜室入禪定 一心一處坐
八萬四千劫 是諸沙彌等 知佛禪未出
爲無量億衆 說佛無上慧 各各坐法座
說是大乘經 於佛宴寂後 宣揚助法化

一一沙彌等 所度諸衆生 有六百萬億
恒河沙等衆 彼佛滅度後 是諸聞法者
在在諸佛土 常與師俱生

因法華緣世世相值

是十六沙彌 且足行佛道 今現在十方
各得成正覺 爾時聞法者 各在諸佛所
其有住聲聞 漸教以佛道 我在十六數
曾亦爲汝說 是故以方便 引汝趣佛慧
明遠緣深功而成就之也

以是本因緣 今說法華經 令汝入佛道
慎勿懷驚懼 譬如險惡道 迫絕多毒獸
又復無水草 人所怖畏處 無數千萬衆
欲過此險道 其路甚曠遠 經五百由旬
毒獸譬生死煩惱水草譬苦提資糧
時有一導師 強識有智慧 明了心決定

在險濟衆難 衆人皆疲倦 而白導師言
我等今頓乏 於此欲退還 導師作是念
此輩甚可愍 如何欲退還 而失大珍寶
尋時思方便 當設神通力 化作大城郭
莊嚴諸舍宅 周帀有園林 渠流及浴池
重門高樓閣 男女皆充滿 即作是化已
慰衆言勿懼 汝等入此城 各可隨所樂
前止云化作一城即通譬道果此又云郭
及舍宅男女等者詳譬果中德用也國邑
有城重城爲郭城以郭爲防果以德爲輔
舍宅譬依止之德以畢竟空寂爲莊嚴園
林譬庇賴之德以無漏法樹爲周帀浴池
譬潔淨之德以八解定水爲渠流樓閣譬
超達之德以空無相無作爲重門男女充
滿即所謂善心誠實男慈悲心爲女也然

此譬二乘果德而有似大乘之德者乃以
似量權進之耳故總依化城爲言及乎即
滅化城則此等皆滅譬二乘之德曾無實
證終歸壞滅也世之學者以比智知道以
似量見性緣無實證亦若是矣

諸人既入城 心皆大歡喜 皆生安隱想
自謂已得度 導師知息已 集衆而告言
汝等當前進 此是化城耳 我見汝疲極
中路欲退還 故以方便力 權化作此城
汝今勤精進 當共至寶所 我亦復如是
爲一切導師 見諸求道者 中路而懈廢
不能度生死 煩惱諸險道 故以方便力
爲息說涅槃 言汝等苦滅 所作皆已辦
此云已辦乃權進之及其住於二地即實
說未辦

既知到涅槃 皆得阿羅漢 爾乃集大衆
爲說真實法

如科

諸佛方便力 分別說三乘 唯有一佛乘
息處故說二 今爲汝說實 汝所得非滅

此令觀察籌量所得非真

爲佛一切智 當發大精進 汝證一切智

十力等佛法 具三十二相 乃是真實滅

勉之令趣實果也

諸佛之導師 爲息說涅槃 既知是息已

引入於佛慧

總結化城一品意義也

妙法蓮華經要解卷第九終

音釋

渺亡小切賒始遊切不
水長也賒及賣也

妙法蓮華經要解卷第十

溫陵開元蓮寺比丘 戒環 解

五百弟子授記品第八

三周說法各隨機領悟而述成與記前化城品因緣說一周以被下根滿慈與五百羅漢等於此領悟佛爲述成與記故曰五百授記品然此先記滿慈次記五百千二之衆而特取五百名品者滿慈乃大弟子內秘外現爲衆標領雖先與記非是當機又千二居末不當名品故也十大弟子無非上根領悟得記本無先後但各專一德隨機總衆耳滿慈說法第一而五百羅漢常說無上道故號爲普明是當說法之機故以滿慈總之如阿難羅云亦大弟子而總學衆各有以也

爾時富樓那彌多羅尼子從佛聞是智慧方便隨宜說法又聞授諸大弟子阿耨多羅三藐三菩提記復聞宿世因緣之事復聞諸佛有大自在神通之力得未曾有心淨踊躍即從座起到於佛前頭面禮足却住一面瞻仰尊顏目不暫捨

聞智慧方便隨宜說法通領三周之說也又聞大記通領舍利弗等受記事也復聞因緣即別領大通王子之事復聞神力別領導師神化之事罕聞故得未曾有感除故心淨踊躍於是避座致恭而後申歎發誓

而作是念世尊甚奇特所爲希有隨順世間若干種性以方便知見而爲說法拔出衆生處處貪著我等於佛功德言不能宣唯佛世